

## #আমি পদ্মজা পর্ব ২৮

---

অন্দরমহলের সদর দরজায় গ্রামের মেয়েদের  
ভীড়। তারা সবাই নতুন বউ দেখতে এসেছে।  
আমিরের কোলে পদ্মজাকে দেখে মিটিমিটি  
হাসছে। ফিসফিসিয়ে একজন আরেকজনকে  
কিছু বলছে। ফরিনা ধমক দিয়ে কোলাহল  
থামিয়ে দেন। আমির দরজার সামনে উপস্থিত  
হতেই আনিসা বলল, 'এইবার বউকে নামান  
ছোট ভাই। বড় আন্নার পা ছুঁয়ে সালাম  
করে, এরপর ঘরে ঢুকেন।'

আনিসা আমিরের চাচাতো ভাইয়ের বউ।  
জাফরের স্ত্রী। দেশের বাইরে থাকে। ঢাকার  
প্রফেসরের মেয়ে আনিসা। বিয়ের পরপরই  
স্বামী নিয়ে দূর-দূরান্তে পাড়ি জমায়। দুই সপ্তাহ  
আগে ছুটি কাটাতে শ্বশুরবাড়ি আসে।  
আনিসার কথামতো আমির পদ্মজাকে কোল

থেকে নামিয়ে দিল। এরপর দুজন নত হয়ে  
ফরিনাকে সালাম করল। ফরিনা হেসে ছেলে  
এবং ছেলের বউকে চুমু খান। আবেগে  
আপ্লুত হয়ে বলেন, 'সুখী হ বাবা। বউয়ের  
খেদমতে ভালো থাক জীবনভর। আমার  
কইলাম বছরের মধ্যেই নাতি চাই।'

লাবণ্য মাঝে ফোঁড়ন কাটল, 'পদ্ম আমার লগে  
শহরে যাইব আন্মা। আমরা একলগে কলেজে  
পড়বাম। নাতি-টাতি পরে পাইবা।'

ফরিনা ক্ষুধার্ত বাঘিনীর মতো তেড়ে এসে  
লাবণ্যর গালে চড় বসিয়ে দেন। উঁচু কণ্ঠে  
বললেন, 'আমার কথার পিছে কথা কওনের  
সাহস দেখাবি না।'

আকস্মিক ঘটনায় সবাই হকচকিয়ে যায়।  
পদ্মজা অবাক চোখে তাকায়। সামান্য কথার  
জন্য কোনো মা এতো মানুষের সামনে যুবতী  
মেয়েকে মারে? লাবণ্য লজ্জায়, অপমানে

কাঁপতে থাকে। চোখে টলমল জল নিয়ে স্থান  
ত্যাগ করে। একরকম পালিয়েই গেল। ফরিনার  
চোখেমুখে কাঠিন্যতা ফুটে আছে। পদ্মজা  
ভয়ে চোখের দৃষ্টি মাটিতে রাখে। ফরিনা  
পদ্মজার হাতে ধরে ভেতরে নিয়ে যান।যেতে  
যেতে বলেন,'মুখে মুখে কথা কইবা না  
কুন্ডিন। যা কই মাইন্যা চলবা। শ্বশুর বাড়ির  
সব মানুষ হইতাছে গিয়া দেবতার লাহান।  
তাগোরে সেবা করলেই জান্নাত পাওন যাইবো।  
নইলে কুন্ডিন জান্নাতে পাও দিতে পারবা না।  
হ্ননছি তো,তুমি হইছো গিয়া অনেক বাধ্য  
ছেড়ি। কামে কাজেও দেখাইবা। মনে রাখবা  
আমার কথা গুলান।'

পদ্মজা মাথা নাড়ায়। মুসলমানদের দেবতার  
সাথে তুলনা করাটা পদ্মজার ভালো লাগেনি।  
কিছু কথা গলায় এসে আটকে গেছে। বলার  
সাহস পাচ্ছে না। ফরিনা আবার বলেন,'হ্ননো

বউ, স্বামীর উপরে কিছু নাই। স্বামীরেই দুনিয়া  
ভাববা। মা-বাপ,ভাই-বোন হইছে গিয়া পর।  
স্বামী আপন। স্বামীর বাইরে কিছু ভাববা না।  
স্বামী যা কয় তাই মানবা। স্বামীর পা ধুইয়া দিবা  
নিজের হাতে। স্বামী বইতে কইলে বইবা, উঠতে  
কইলে উঠবা। হুত্তে কইলে হুইবা। স্বামী যহন  
কাছে ডাকব না করবা না। আল্লাহ বেজার  
হইবো। ফেরেশতারা অভিশাপ দিব। দুনিয়াত  
স্বামীর আদরের থাইকা মধুর আর কিছু নাই।  
মনে রাখবা।’

পদ্মজা অপ্রতিভ হয়ে উঠেছে।  
লজ্জায়, আড়ষ্টতায় সারা শরীর তীব্র গরমে  
ঘামছে। আনিসা ফরিনাকে ফিসফিসিয়ে  
বলল, ‘বড় আন্মা, মানুষ আছে তো অনেক।  
পরেও বলতে পারতেন।’

আনিসার কথা পুরোপুরি উপেক্ষা করলেন  
ফরিনা। তিনি পদ্মজাকে একটা চেয়ারে বসিয়ে

দিলেন। আবার বলতে শুরু করলেন, 'খালি স্বামী লইয়াও পইড়া থাহন যাইব না। তোমার শ্বশুর-শ্বাশুড়ি জীবিত আছে। তাগোর সেবা করবা। যহন যা করতে কই করবা। না পারলে কইবা শিখাইয়া দিমু। প্রতিদিন ভোরে উঠবা। নামায পইড়া রান্কাঘরে যাইবা। তহন বাকিসব ভুইলা রান্কনে মন দিবা।'

আমির কপালের চামড়া কুঁচকে মায়ের কথা শুনছিল। এবার সে ধৈর্যহারা হয়ে বলল, 'রান্কাবান্কা করার জন্য অনেক মানুষ আছে আন্মা। পদ্মজার রাঁধতে হবে না। আর আমার এতো সেবাও লাগবে না। বড্ড ক্লান্ত লাগছে। ভীড় কমাও। আর নিয়মনীতি শেষ করো। এরপর আমার বউ আমার ঘরে ছেড়ে দেও।'

আমিরের কথা শেষ হতেই হাসির রোল পড়ে যায়। পদ্মজা ঠোঁট টিপে হাসল। ফরিনা কিছু

কঠিন কথা বলতে প্রস্তুত হোন। আনিসা আমিরকে রসিকতা করে বলল, 'আজ তো একসাথে থাকা যাবে না। আরো একদিন ধৈর্য ধরেন।'

আমির প্রবল বিস্ময় নিয়ে জিজ্ঞাসা করে, 'কেন? বিয়ে তো হয়ে গেছে।'

কেউ আমিরের জবাব দিল না। উল্টা সবাই হাসতে থাকল।

'আইজ কাইলরাত্রি হতচ্ছাড়া!' বলল শাহানা। জাফরের বড় বোন। আমিরের বিয়ে উপলক্ষে বাপের বাড়ি এসেছে। সাথে নিয়ে এসেছে পুরো শ্বশুরবাড়ি। আমির শাহানাকে প্রশ্ন করল, 'কালরাত্রি তো হিন্দুদের নিয়ম। আমি মানি না। আমার বউ আমার ঘরে দিয়ে আসা হোক।'

'সবসময় ত্যাড়ামি করিস কেন? আমরাও তো নিয়ম মেনেছি।' বলল জাফর। কণ্ঠে তার

গস্তীর্ঘতা। তাতেও লাভ হলো না। আমির  
কিছুতেই এই নিয়ম মানবে না।  
ফরিনা, শাহানা, শিরিন, আনিসা, আমিনাসহ  
অনেকে আমিরকে মানানোর চেষ্টা করল।  
কারো কথা আমিরের কর্ণগোচর হলো না। তার  
মধ্যে রিদওয়ান আমিরের সাথে তাল দিল।  
বলল, 'কালরাত্রি-টাত্রি বাদ। এসব নিয়ম মেনে  
লাভটা হবে কী? যার বউ তাকে তার বউ দিয়ে  
দেও।'

'তুই চুপ থাক। আগুনে ঘি ঢালবি না।' বললেন  
আমিনা।

রিদওয়ান চুপসে গেল। থামলো না শুধু আমির।  
ফরিনাও জেদ ধরে বসে আছেন। তিনি আমির-  
পদ্মজাকে আজ কিছুতেই একসাথে থাকতে  
দিবেন না। যেমন মা তেমন তার ছেলে। মজিদ  
হাওলাদার অনেকক্ষণ যাবৎ এসব দেখছেন।  
চঁচামিচি আর নেয়া যাচ্ছে না। তিনি উপর

থেকে নেমে আসেন। অন্দরমহল তিন তলার।  
তৃতীয় তলায় কেউ থাকে না। শুধু ছাদ আছে।  
ঘর বানানো হয়নি। অসমাপ্ত ইটের পুরনো  
বাড়ি। চিন্তাভাবনা চলছে, তৃতীয় তলাটা থাকার  
জন্য উপযুক্ত করার। মজিদকে দেখে সবাই  
থেমে গেল। তিনি পদ্মজার পাশে চেয়ার নিয়ে  
বসেন। পদ্মজা একটু নড়েচড়ে বসে। মজিদ  
পদ্মজাকে জিজ্ঞাসা করলেন, 'তু কি কী চাও মা?  
আজ শ্বাশুড়ির সাথে থাকবে? নাকি আমার  
পাগল ছেলের সাথে? ভেবে বলো। তুমি যা  
বলবে তাই হবে।'

পদ্মজা উসখুস করতে করতে বলল, 'জি,  
আম..আম্মার সাথে থাকব।'

ফরিনার ঠোঁটে বিশ্বজয়ের হাসি ফুটে উঠে।  
তিনি আমিরের দিকে তাকিয়ে ব্যঙ্গ করে  
হাসেন। পরপরই পদ্মজার উপর ঝাঁপিয়ে  
পড়েন। চুমুতে পদ্মজা গাল ভরিয়ে দেন।

একবার আড়চোখে আমিরকে দেখল পদ্মজা।  
আমির তাকিয়েই ছিল। পদ্মজা তাকাতেই  
আমির চোখ রাঙানি দিল। সঙ্গে সঙ্গে পদ্মজা  
দৃষ্টি ফিরিয়ে নিল। বিয়ের বাকি সব নিয়ম শুরু  
হয়। উপর থেকে নেমে আসেন নূরজাহান।  
তিনি এই বাড়ির প্রধান কর্তা। মজিদ  
হাওলাদারের জন্মদাত্রী।

‘কইরে... কইরে আমার নাত বউডা কই?’ বলতে  
বলতে ছুটে আসেন তিনি। উপস্থিত সবাই দৃষ্টি  
ঘুরিয়ে নূরজাহানের দিকে তাকাল। নূরজাহান  
পদ্মজার সামনে এসে বসেন। পদ্মজার  
মুখখানা দুই হাতে ধরে দেখেন। এরপর মুগ্ধ  
হয়ে বললেন, ‘বাবু দেহি চাঁদ লইয়া আইছে! এই  
ছেড়ি তোর জন্যি আমার জামাই তো এহন  
আমার দিকে চাইবোই না।’

নূরজাহান কেন এ কথা বললেন, পদ্মজা ঠাওর  
করতে পারল না। আমির যখন হেসে

বলল, 'আরে বুড়ি, তুমি তো আমার প্রথম বউ।  
ভুলি কীভাবে?' তখন পদ্মজা নূরজাহানের  
কথার মানে বুঝল। বুঝতে পেরে ঠোঁট চেপে  
হাসল। নূরজাহান আমিরের খুতুনিতে চিমটির  
মতো ধরে বললেন, 'আমার চান্দের টুকরা।  
বউরে আদর কইরো ভাই। বকাঝকা কইরো  
না। ছেড়িডা জন্ম ঘর ছাইড়া আইছে। তুমি  
এখন সব। তুমি যেমনে রাখবা তেমনেই থাকব।  
স্বামী হাত ছাইড়া দিলে শ্বশুরবাড়ির আর  
কেউই বউদের আপন হয় না। বুঝছো ভাই?'  
আমির নূরজাহানের পা ছুঁয়ে সালাম করে  
বলল, 'বুঝছি জান।'  
নূরজাহান মন খারাপের নাটক করে  
বললেন, 'এইডা ঠিক না ভাই।'  
'কোনটা?'  
'এহন থাইকা জান ডাকবা বউরে। আমি  
হইলাম দুধভাত।'

আমির একটু জোরেই হাসল। সাথে আরো  
অনেকে হাসল। পদ্মজা নত হয় নূরজাহানের  
পা ছুঁয়ে সালাম করার জন্য। নূরজাহান দ্রুত  
আটকালেন পদ্মজাকে। জড়িয়ে ধরে পিঠে  
হাত বুলিয়ে আদর করে বললেন, 'রূপে যেমন  
গুণেও তেমন থাইকো বইন।'

'রাইত বাড়তাছে। সব নিয়ম তো শেষ। যাও  
যের ঘরে যাও। এই তোরা বাড়িত যাইতে  
পারবি? রাইতের বেলা আইছিলি কেন? বউতো  
কাইলও দেহন যাইতো। জাফর ছেড়িগুলারে  
দিয়া আইতে পারবি? মদন কই? মগা কই?  
কামের বেলা দুইডারে পাওন যায় না।'

কথাগুলো একনাগাড়ে বললেন ফরিণা বেগম।  
তিনি নূরজাহানের উপস্থিতি যেন উপেক্ষা  
করতে চাইছেন। মদন ছুটে আসে বাইরে  
থেকে। মাথা নত করে ফরিণাকে বলল, 'আইছি  
খালাম্মা।'

‘থাহস কই? যা এদের দিয়া আয়। আমরার  
বাড়িত যহন আইছে এরা এহন আমরার  
দায়িত্বে। সুন্দর কইরা বাড়িত দিয়া আইবি।’  
‘আচ্ছা খালাম্মা। আপারা চলেন!’

মেয়েগুলো সারাক্ষণ হাসছিল। যাওয়ার সময়ও  
হাসতে হাসতে গেল। মেয়েগুলোর উদ্দেশ্যে  
রানি ঠোঁট বাঁকায়। তা খেয়াল করল রিদওয়ান।  
সে রানির মাথায় গাট্টা মেরে বলল, ‘সারাক্ষণ  
মুখ মুরাস কেন? একদিন দেখবি আর মুখ  
সোজা হচ্ছে না। বিয়েও হবে না।’  
‘না হলে নাই। ছেড়িগুলারে দেখছো বড় ভাই?  
কেমনে হে হে কইরা হাসতছিল।’  
‘তাতে তোর কী?’

নূরজাহান পদ্মজাকে বললেন, ‘হ মেলা রাইত  
হইছে। আইয়ো বনু আমার ঘরে আইয়ো।  
আইজ আমার লগে থাকবা।’

‘আপনার লগে ক্যান? পদ্মজায় আমার লগে

আমার ঘরে থাকব। হেইডাই তো কথা হইছে।  
পদ্মজায়ও এইডাই চায়।’

‘দেহো বউ, তর্ক কইরো না। নাত বউ আমার  
পছন্দ হইছে। আমি আমার লগে রাখুম।’

‘এই পদ্মজা তুমি কার লগে থাকবা?’ ফরিণা  
কিঞ্চিৎ রাগান্বিত স্বরে প্রশ্ন করেন। পদ্মজার  
অবস্থা দরজার চাপায় পড়ার মতো। এ কোন  
জগতে এসে পড়লো সে! পদ্মজা গোপনে  
টোক গিলল। নূরজাহান আমিরকে আদেশ  
করলেন, ‘খাড়ায়া রইছস কেন? বউরে কোলে  
লইয়া আমার ঘরে দিয়া যা।’

আমির পদ্মজাকে কোলে তুলতে গেলে ফরিণা  
বললেন, ‘বাবু, আমি তোঁর মা। তোঁরে জন্ম দিছি  
আমি। আমার কথাই শেষ কথা মানবি। আমার  
ছেড়ার বউ আমার ঘরে থাকব। আমার কথা  
অমান্য করলে জান্নাত পাইবি না।’

নূরজাহান পদ্মজাকে উদ্দেশ্যে করে

বললেন, 'দেখছেননি বনু? এমন কইলজা বড় বউ কেউ ঘরে রাহে? আমি মানুষ ভালা বইলা এই বউরে বাইর কইরা দেই নাই। সহ্য কইরা কইরা এহন মরার পথে আছি।'

'তোমাদের কারোর সাথে থাকতে হবে না। আমার বউ আমার ঘরেই চলুক।' বলল আমি। কণ্ঠে তার খুশির মেলা। সুযোগ বুঝে নিজের জিনিষ নিজে বুঝে নিতে চাইছে। ফরিনা তীক্ষ্ণ দৃষ্টি নিয়ে আমিরের দিকে তাকান। নূরজাহানকে বললেন, 'আপনার ঘরেই লইয়া যান।'

ফরিনার কথা শুনে আমিরের মুখটা ফাটা বেলুনের মতো চুপসে গেল। নূরজাহান হাসলেন। এই হাসি বিজয়ের হাসি।

'ভাই, বউরে কোলে লও। লইয়া আও আমার ঘরে।' নূরজাহান বললেন।

'আমি হেঁটে যেতে পারব। একটু হাঁটা দরকার।'

মিনমিনিয়ে বলল পদ্মজা।

‘আইচ্ছা তাইলে হাঁটো। ধরো আমার হাত ধরো।’ নূরজাহান হাত বাড়িয়ে দেন। পদ্মজা নূরজাহানের হাত শক্ত করে ধরে মৃদু করে হাসলো। নূরজাহান এবং পদ্মজার সাথে আমির আসে। সে দাদীর ঘর অবধি যাবে। পদ্মজাকে তার মোটেও ছাড়তে ইচ্ছে করছে না।

নূরজাহানের ঘরে যাওয়ার পথে পদ্মজা কান্নার সুর শুনতে পায়। কে যেন কাঁদছে। কী করুণ সেই কান্নার স্বর! এদিক-ওদিক দৃষ্টি মেলে তাকাল পদ্মজা। আরেকটু এগোতেই খুব কাছে জোরে একটা আওয়াজ হয়। পদ্মজা কেঁপে উঠে। দ্রুত সেদিকে তাকায়। তার চেয়ে দুই হাত দূরে একটা দরজা। ভেতর থেকে কেউ দরজায় ধাক্কাচ্ছে আর কাঁদছে। পদ্মজাকে ভয় পেতে দেখে আমির বলল, ‘ভয় পাচ্ছে?’

‘কে ওখানে? এভাবে কাঁদছে কেন? দরজা খুলে  
দিন না!’

পদ্মজা ভয় এবং ব্যথিত কণ্ঠে বললো। তার  
কথায় আমির বা নূরজাহান কারো কোনো  
ভাবান্তর হলো না। পদ্মজাকে নিয়ে পাশ কেটে  
চলে গেল।

চলবে...